

Vjernik

ISLAMSKI ČASOPIS

01.01.18 – 31.03.18 / 1439 H.G. broj 10. godina 3. ISSN 2511 - 0772

Onaj ko se pokorava Poslaniku, taj se pokorava i Allahu!
(Ex-Nisa,'80)



بِسْمِ اللَّهِ الرَّحْمَنِ الرَّحِيمِ
 Islamska zajednica bošnjaka Offenbach,
 Dzema'at Firdeus Offenbach

Sagradimo zajedno džamiju

250 vakifa

UGRADI TRAJNU SADAKU, BUDI VAKIF!

"KO SAGRADI DŽAMIJU RADI ALLAHA, ALLAH ĆE NJEMU SAGRADITI KUĆU U DŽENNETU." (PRENOSE EL-BUHARI, MUSLIM, ET-TIRMIZI, IBN MADŽE I AHMED)



Bürgerforum Firdeus e.V.
 Sparkasse Offenbach am Main
 IBAN: DE42505500200004130723
 BIC: HELADEF1OFF



Wald Strasse 167
 63071 Offenbach am Main
 Germany



Edukativni islamski časopis Vjernik

63477 Maintal

Germany

Registracija: ISSN 2511-0772

Esselamu alejkum ve rahmetullahi ve berekatuhu

Islamski časopis "Vjernik" je islamsko - edukativnog karaktera na principima Kur'ana i Sunneta. Pored tema koje govore o ispravnom shvatanju ove uzvišene vjere, dio ovog časopisa je posvećen ženi i porodici u islamu, zdravlju a ni naši najmlađi nisu zaboravljeni.

Cilj i svrha ovog časopisa jeste da'va ili pozivanje ljudi da obožavaju i potpuno se pokoravaju Allahu, Uzvišen je On, i da slijede sunnet Allahovog poslanika Muhammeda, sallallahu 'alejhi ve selleme, te da ustraju na tom putu.

Izdavač: Džemat FIRDEUS

Urednik: A. Mujakić

Grafički dizajn: S. M

Naslovna strana: E. M

U ovaj projekat su uključeni članovi džemata Firdeus.

Ukoliko želite naručiti islamski časopis "Vjernik" kontaktirajte nas putem Email: Adismujakic@gmx.de , i vjernik stiže besplatno na vašu adresu.

Redakcija islamskog časopisa "Vjernik"

Esselamu alejkum!

SADRŽAJ

3.....Tefsir sure El-Kader

8..... Istina je preča da se slijedi

9..... Upoznaj Poslanika u nekoliko minuta

10..... Šta ćeš učiniti ako postaneš bogat

11.....Svjedočenje zatvorenika Guantanamo

12..... Ekstremna hladnoća

15..... Radost Bošnjaka u švedskoj

16..... Da li ste znali

17..... Genocid je zaboraviti


19.... Demografska borba Palestinaca protiv Izraela

20..... Za naše najmlađe

21..... Firdeus info

22..... Živjeti zdravo

Vjernik
ISLAMSKI ČASOPIS



Tefsir sure El-Kadr

- (1) "Mi smo ga objavili u Noći kadr,
- (2) a šta ti znaš šta je Noć kadr?
- (3) Noć kadr bolja je od hiljadu mjeseci,
- (4) meleki i Džibril, s dozvolom Gospodara svoga, spuštaju se u njoj zbog odluke svake,
- (5) ona je spas sve dok zora ne svane."

O suri El-Kadr

Sura El-Kadr je 97. sura u Kur'anu, prije nje se nalazi sura El-Alek, a poslije nje sura El-Bejjina. Sastoji se iz 5 ajeta, 30 riječi i 112 harfova. (Hazin, Alauddin Alij b. Muhammed b. Ibrahim, *Lubabut-te'vil fi meanit-tenzil*, 4/450)

U Mushafu i mnogim tefsirima naziva se El-Kadr, dok su je Ibn Atijja i Ebu Bekr el-Džessas u svojim tefsirima nazvali Lejletul-kadr.

Naziva se El-Kadr jer govori o početku objave Kur'ana u Noći kadra u mjesecu ramazanu i zbog toga je i dobila ime Lejletul-kadr, tj. ugledna i znamenita noć (Ebu Selama, Ahmed b. Alij, *Es-Suverul-kur'anijje ve esmauhal-dželijje*, str. 115), Tako da je i sama sura po toj noći i objavi Kur'ana u njoj dobila ime El-Kadr (Zuhajli, *Tefsirul-Munir*, 30/330).

Komentatori Kur'ana razilaze se u pogledu toga da li je ova sura mekanska ili medinska, odnosno da li je objavljena prije ili poslije Hidžre. Kurtubi tvrdi da je sura medinska i da je to stav većine komentatora Kur'ana. U prilog ovom stavu ide i sadržaj same sure koja nas podstiče na provođenje Noći kadra u ibadetu, a Noć kadra vezana je za ramazan, ramazan za post, a post je propisan nakon Hidžre. Oni koji prihvataju ovaj stav kažu da je objavljena nakon sure El-Mutaffifin, a prije sure El-Bekara.

Glavni cilj sure El-Kadr jeste pojašnjenje posebnosti i znamenitosti Noći kadra i razloga svega toga, tj. pojašnjenje veličine i vrijednosti Kur'ana te da je on od Uzvišenog Allaha. (Ibn Ašur, *Et-Tahrir vet-tenvir*, 30/455; *El-Muhtesar fit-Tefsir*, str. 598)

Povezanost sure El-Kadr sa surama El-Alek i El-Bejjina

Uzvišeni Allah u suri El-Alek naređuje Svome vjerovjesniku, sallallahu alejhi ve sellem, da uči Kur'an radi Njega, svoga Gospodara, koji sve stvara, u ime Njega, Svevišnjeg, koji čovjeka poučava onome što ne zna. Zatim, u ovoj suri pojašnjava kada je počela objava Kur'ana. To je bilo u Noći kadra, u odabranoj i znamenitoj noći koja je postala takva upravo zbog objave Kur'ana u njoj. (Zuhajli, *Tefsirul-Munir*, 30/331; Ebu Hajjan el-Endelusi, *El-Bahrul-muhit*, 8/495)

U prvom ajetu sure El-Kadr kaže se: **“Uistinu, Mi smo ga (Kur'an) počeli objavljivati u Noći kadra”**, nakon čega u suri El-Bejjina dolazi pojašnjenje zašto je Svevišnji Allah objavio Kur'an: objavio ga je kako bi se mnogobošci i drugi nevjernici odrekli svoga nevjerstva, jer **“nisu se nevjernici između sljedbenika Knjige i mnogobošci odvojili, (od zablude) sve dok im nije došao dokaz jasn”**.

Tako se u suri El-Bejjina pojašnjavaju razlozi objavljivanja Kur'ana, dok se o samoj objavi govori u suri El-Kadr. (Zuhajli, *Tefsirul-Munir*, 30/339)

Tematika i sadržaj sure

Sura El-Kadr govori o početku objavljivanja časnog Kur'ana, kao i o vrijednosti Noći kadra nad ostalim noćima i mjesecima zbog spuštanja meleka Džibrila i ostalih meleka u njoj s bereketom i svakim dobrom na vjernike, Allahove dobre robove. A sve to opet iz milosti Najmilostivijeg koji Svoju dobrotu spušta na koga hoće od Svojih robova. (Zuhajli, *Tefsirul-Munir*, 30/330)

Komentar sure

(1) “Mi smo ga objavili u noći Kadr”

“Mi” – Uzvišeni Allah ovdje spominje Sebe po veličini jer je Allah najveći i najuzvišeniji. Ponekad Uzvišeni Allah na ovakav način spominje Sebe, po uzvišenosti, ne po brojnosti, kao što kaže u suri El-Hidžr: **“Doista smo Mi objavili Kur'an i Mi ćemo nad njim bdjeti”** (El-Hidžr, 9); **“Mi ćemo, zaista, oživjeti mrtve i Mi smo zapisali ono što su uradili i djela koja su iza sebe ostavili – sve smo Mi to u Knjizi jasno pobrojali”** (Jasin, 12). (Ibn Usejmin, *Tefsir džuz Amme*, str. 272)

“Mi smo ga objavili”, tj. objavili, spustili smo Kur'an. U cijeloj suri Kur'an nije spomenut jasno po imenu, već je za njega upotrijebljena zamjenica jer je Kur'an uzvišen, poseban i poznat tako da ga ne treba posebno spominjati. (Kurtubi, *El-Džamii li ahkamil-Kur'an*, 20/130) Kada je nešto poznato, s tim druge ne treba upoznavati.

Postoje dva mišljenja o tome kako je objavljen Kur'an.

Prvo: Mi smo Kur'an počeli objavljivati u blagoslovljenoj Noći kadr (Zuhajli, *Tefsirul-Munir*, 30/331; Ibn Usejmin, *Tefsir džuz Amme*, str. 273; Kurtubi, *El-Džamii li ahkamil-Kur'an*, 20/130; Ibn Atijja, *El-Muharerul-Vedžiz*, 5/504; Sa'di, *Tejsirul-Kerimir-Rahman*, str. 1098), koja se nalazi u blagoslovljenom mjesecu ramazanu.

Drugo: Ibn Abbas, radijallahu anhum, Seid b. Džubejr (Taberi, *Džamiul-bejan an te'vili ajil-Kur'an*, 15/285–286) i drugi kažu: “Uzvišeni Allah objavio je odjedanput cijeli Kur'an iz Levhi-mahfuz, koji je u cjelini spuštan na nama najbliže nebo, a odatle je postepeno objavljivao po potrebi, prema događajima, u toku dvadeset tri godine Allahovom Poslaniku, sallallahu alejhi ve sellem. (Vidjeti: Ibn Kesir, *Tefsirul-Kur'anil-azim*, 4/482; Begavi, *Mealimut-tenzil*, 4/653)

“Mi smo ga objavili u noći”, u toku noći, a ne u toku dana. Ovaj detalj govori o vrijednosti noći, što se na mnogim mjestima potvrđuje u Kur'anu i sunnetu. Uzvišeni kaže: **“Slavljen neka je Onaj koji je noću premjestio Svoga roba iz Mesdžidul-harama u Mesdžidul-aksa...”** (El-Isra, 1); **“I probdij dio noći u namazu...”** (El-Isra, 79); **“I veličaj Ga**

(Allaha) noću i nakon obavljenih namaza” (Kaf, 40); “Ustajanje noću, zaista, jače djeluje i izgovara se glasnije” (El-Muzzemmil, 6); “Noću su malo spavali.” (Ez-Zarijat, 17)

Allahov Poslanik, sallallahu alejhi ve sellem, kaže: “*Naš Uzvišeni Gospodar svake se noći spušta na zemaljsko nebo kada preostane zadnja trećina noći...*” (Buhari, br. 1094; Muslim, br. 1808)

Sve ovo ukazuje na to da je noć posebno vrijeme kada se spušta dobro i davanje od Uzvišenog Allaha, kada Svevišnji Gospodar posebno daruje Svoje robove, jer su i srca tada slobodna, nisu okupirana dunjalučkim poslovima, noć je vrijeme smiraja, te srca tada više osjećaju strahopoštovanje prema Allahu, čišća su i prisutnija. (Šenkiti, *Advaul-bejan fi idahil-Kur’ani bil-Kur’an*, 6/104)

“Mi smo ga objavili u Noći kadr.”

Noć kadra je blagoslovljena noć. Nalazi se u zadnjih deset noći blagoslovljenog mjeseca ramazana, i to u neparnim noćima.

Dobila je naziv Noć kadra jer je to posebna noć i zbog toga što se u njoj određuje, sve rješava (Kurtubi, *El-Džamiu li ahkamil-Kur’an*, 20/130), Allah u njoj propisuje šta će se u toj godini dogoditi. (Šenkiti, *Advaul-bejan fi idahil-Kur’ani bil-Kur’an*, 6/101), o čemu govori u suri Ed-Duhan: **“Mi smo počeli da ga u Blagoslovljenoj noći objavljujemo – i Mi doista opominjemo – u kojoj se svaki mudri posao riješi.”** (Ed-Duhan, 3–4)

Hasan el-Basri, rahimehullahu teala, rekao je: “U njoj se svaki mudri posao riješi, u njoj Allah propiše smrtni čas, tj. kada će se umrijeti, djela koja će se raditi, opskrbu i tome slično.” (Taberi, *Džamiul-bejan an te’vili ajil-Kur’an*, 15/286)

Seid b. Džubejr, rahimehullahu teala, kaže: “U Noći kadr odrede se hadžije za tu godinu, zapišu se njihova imena i imena njihovih očeva, te niko od njih ne izostane, njihov broj se ne poveća niti smanji.” (Taberi, *Džamiul-bejan an te’vili ajil-Kur’an*, 15/286)

Također, kaže se da je dobila to ime zbog vrijednosti onih vjernika koji je probdiju u ibadetu, kako se navodi u hadisu Allahovog Poslanika, sallallahu alejhi ve sellem: “*Ko Noć kadra provede u namazu, vjerujući u Allaha i očekujući nagradu samo od Allaha, bit će mu oprošteni prethodni grijesi*” (Buhari, br. 2014; Muslim, br. 760). (Luhejmid, *Tefsir džuz Amme*, str. 63)

(2) “A šta ti znaš šta je Noć kadr?” Ovim pitanjem ustvari se ukazuje na značaj ove noći u kojoj je Uzvišeni Allah objavio Kur’an. Znaš li ti kakva je to noć, koliko je vrijedna i posebna?! (Ibn Usejmin, *Tefsir džuz Amme*, str. 274) Znaš li koliko se dobro i koliki bereket spuštaju u ovoj noći?! (*El-Muhtesar fit-Tefsir*, str. 598)

Odgovor na prethodno pitanje pojašnjava Uzvišeni riječima:

(3) “Noć kadr bolja je od hiljadu mjeseci”, tj. ova je noć bolja od hiljadu mjeseci u kojima nema Noći kadra. Pod riječju **“bolja”** misli se na vrijednost djela učinjenog u njoj (Ibn Usejmin, *Tefsir džuz Amme*, str. 274), tj. dobro djelo učinjeno u njoj bolje je od djela koja se čine u trajanju od hiljadu mjeseci u kojima nema Noći kadra. (Taberi, *Džamiul-bejan an te’vili ajil-Kur’an*, 15/286–287; Ibn Kesir, *Tefsirul-Kur’anil-azim*, 4/483; Begavi, *Mealimut-tenzil*, 4/658)

Dakle, ovo je noć od posebne vrijednosti, ona je za onoga ko je provede u namazu i ibadetu radi Allaha i očekujući nagradu od Allaha bolja od hiljadu mjeseci u kojima nema te noći (*El-Muhtesar fit-Tefsir*, str. 598), jer se djela dobrih robova u njoj uvećavaju sve dok ne budu vrednija od takvih djela koja se urade u toku hiljadu mjeseci.

Također, težina grijeha učinjenog u Noći kadra uvećava se sve dok ne bude veća od takvih grijeha koji bi se učinili u toku hiljadu mjeseci. (Šenkiti, *Advaul-bejan fi idahil-Kur’ani bil-Kur’an*, 6/104)

(4) “Meleki i Džibril, s dozvolom Gospodara svoga, spuštaju se u njoj zbog odluke svake”, tj. zbog blagoslovljenosti ove noći u njoj se meleki spuštaju više nego uobičajeno. Meleki se u ogromnom broju postepeno spuštaju s nebesa sve dok ne ispune Zemlju. S njima se, dozvolom Uzvišenog Allaha, spuštaju milost, svako dobro i bereket. Tako se oni spuštaju kad se uči Kur’an i okupljaju oko ljudi koji obavljaju zikr.

Pod riječju “Er-Ruh” ovdje se misli na Džibrila, alejhis-selam. Posebno je spomenut zbog vrijednosti i ugleda koji ima kod Svevišnjeg Allaha.

Ovdje se pod odlukom misli na kadersku volju, dakle ono što će se dogoditi, svejedno bilo dobro ili zlo, a nije riječ o šerijatskoj odluci i šerijatskoj volji.

(5) “Spas je u njoj sve dok zora ne svane”, tj. Noć kadr je sigurna i spasonosna zbog toga što se mnogo dobro spusti na mnoge vjernike i od mnogih njih se otkloni kazna zbog tog dobra. U njoj šejtan ne može činiti zlo ni navoditi na njega.

Neki kažu da se u toj noći spuštaju meleki, obilaze one koji klanjaju i blagosiljaju ih sve do zore.

Poruke sure El-Kadr

- Sura El-Kadr poučava nas da trebamo hvaliti i veličati svoga Gospodara, On to voli jer jedino On to i zaslužuje.
- Ova sura potvrđuje uzvišenost našega Gospodara jer je On u Noći kadra počeo spuštati Kur’an. Kur’anski ajeti i vjerodostojni hadisi potvrđuju uzvišenost našega Gospodara nad svim stvorenjima.
- Sura El-Kadr potvrđuje istinitost Objave i poslanstva Muhammeda, sallallahu alejhi ve sellem.
- Objava Kur’ana počela je u blagoslovljenoj Noći kadra.
- Noć kadra je posebno odabrana noć, treba je cijeniti i iskoristiti, u njoj se svaki mudri posao koji se treba desiti u narednoj godini odredi. U njoj se počeo objavljivati Kur’an u kojem je uputa ljudima, Allah je u njoj Muhammeda, sallallahu alejhi ve sellem, učinio vjerovjesnikom, ona je bolja od običnih noći u toku hiljadu mjeseci, u njoj se spuštaju meleki i među njima Džibril i u njoj je spas od svakog zla, u njoj je spas i sigurnost, o njoj je Uzvišeni Allah objavio cijelu suru.
- Dobro djelo učinjeno u Noći kadra vrednije je od takvog djela koje se radi u narednih hiljadu mjeseci (84 godine) zbog ogromnog dobra koje se spušta i dijeli u toj noći, a koje se ne dijeli u drugim noćima.
- Ova sura potvrđuje temelj imana, a to je vjerovanje u Allahovu odredbu.
- Meleki, među kojima je poseban melek Džibril, spuštaju se u ovoj noći sa Allahovom odredbom, aminaju na dove vjernika sve do pojave zore.
- Uzvišeni Allah u toj noći spušta samo dobro, dok se u drugim noćima spušta i dobro i zlo. To dobro u njoj traje sve do zore. U njoj šejtan ne može ništa da naudi vjerniku i vjernici.
- Zbog svega prethodnog, posebno se preporučuje provođenje cijele ove noći u ibadetu.

Izvor: El-Asr / Hajrudin Tahir Ahmetović, prof.

Istina je preča da se slijedi

Karakteristika današnjeg vremena je spremnost mnogih da prihvate istinu samo kada ona odgovara njihovim vizijama ili uvjerenjima. Mnogi će prihvatiti istinu samo kada potječe iz institucije čiji su oni članovi, kada je izrekne njihov autoritet ili bude rečana u partiji ili državi kojoj su naklonjeni. U suprotnom, istina se odbija.

Životni moto iskrenog vjernika treba biti prihvatanje istine od koga god da dođe. Samo na taj način možemo uspjeti. Allahov Poslanik, sallallahu alejhi ve selle, podučio je Ebu Hurejru. r.a., da se istina prihvatačak i od najvećeg neprijatelja-šejtana. U poznatom hadisu, koji je zabilježio Buharija, Allahov je Poslanik, nakon što je čuo od Ebu Hurejrea, r.a., da ga je šejtan podučio da učenje Ajetul-Kursije prilikom odlaska u postelju čuva čovjeka sve dok ne osvane, kazao poznate riječi: „Lažac koji je kazao istinu.“

Ako pogledamo u stanje muslimana sadašnjice, primjetit ćemo da su glede ovog pitanja veoma daleko od onoga na čemu bi trebali biti. Kod mnogih muslimana istina je prava ako se slaže s njihovim predhodno zauzetim stavovima, dok su druga mišljenja unaprijed osuđena na odbacivanje i ismijavanje. Također se sumnja u namjeru onoga ko ih ukazuje, samo zato što se ne poklapaju s njihovim predhodnim uvjerenjima. Mišljenja se prihvataju samo ako dolaze od uleme koja se sluša, a ako ih iznese neko ko za tu osobu nije autoritet, njegovi se dokazi odbacuju. Ukoliko istina dolazi od partije koju tu osoba ne podržava, ona se unaprijed odbacuje, jer nije došla linijom političke stranke koju preferira. Ponekad oni malo iskreniji nesvjesno otkriju svoje namjere i parametre za kvalificiranje istine, pa ih čujete kako više neće slušati mišljenja nekog učenjaka s kojim se ne slažu, jer se njegova istina nije podudarila s njihovom.

Postoji mnogo primjera za ovo o čemu govorimo, koje je nemoguće prebrojati. Mnogo se puta dogodi da ljudi odbace stav, mišljenje, savjet ili dobronamjernu kritiku samo zato što ju je izrekao neko ko njima nije „legao“ na dušu, zato što takav nije u sistemu, što se svojom vanjštinom razlikuje od njih ili što, prema njihovom shvatanju, ne razumije stvarnost, jer ne slijedi mesheb koji oni slijede ili ne pripada pravcu, odnosno grupi kojoj oni pripadaju.

U svemu tome, odbijajući istinu od nekoga nepodobnog, ljudi zapadaju u mnoge grijeha kako bi opravdali svoje odbijanje istine. Tako ćete naići na ljude koji s lahkocomodgovaraju osobe od kojih dolazi istina samo zato što je ne mogu prihvatiti. S lahkocom se dotična osoba potvara da je neiskrena u svojim namjerama. Ljudi olahko lažu na one koji im nude istinu kako bi opravdali svoje odbijanje istine. Čovjek koji poziva istini lahko se kvalificira nekompetentnim u svome poslu, a država i univerzitet u kojima je stjecao znanje-nazadnim i konzervativnim. Sdruge strane, ukoliko je njegov ahabab ili radni kolega završio na istom univerzitetu ili u istoj državi, to ne predstavlja problem, jer je njihova istina jedina, makar obojica znala da nije tako. Određene osobe istinu vagaju mnoštvom onih koji su na tom stavu, pa ukoliko primjete da mnogi ljudi slijede određenu stvar, onda je to pokazatelj istine, što nije tačno, naročito ako znamo koliko su naši prostori geografski udaljeni od kolijevke islama i koliko je vremena prošlo od smrti Allahovog Poslanika, s.a.v.s. Moramo shvatiti da se ljudi prepoznaju po istini, a nikako istina po ljudima, bez obzira o kome je riječ.

Kazao je Alija, r.a.: “Istina se ne prepoznaje po ljudima, već spoznaj istinu, pa ćeš znati ko su njeni nosioci.” (Tefsir el – Kurtubi, 1/340)

Stoga, ako želimo istinski uspjeh i da ovaj napaćeni ummet krene putem prosperiteta, onda nam istina treba biti najpreča, od koga god nam dolazila. Samo tako možemo nadvladati neistinu i probleme u koje je zapao ovaj ummet. Omer, r.a., veoma je dobro znao i spoznao važnost ovakvog pristupa, zato je dovio Uzvišenom Allahu poznatom dovom, koja u osnovi liječi ovaj problem: “Gospodaru naš, istinu nam pokaži istinom i učini nas njenim sljedbenicima, a neistinu nam pokaži neistinom i udalji nas od nje, ne dopusti da nam istina bude nejasna, pa da zalutamo, i podari da budemo vođe bogobojaznih.” (Ibn Kesir, Tefsir, 1/427)

Izvor: Islam u vremenu / mr.Elvedin Pezić

dr. Nasir ez-Zehrani

Upoznaj Poslanika ﷺ u nekoliko minuta



Obaveza je vjerovati u sve vjerovjesnike i poštovati ih

Uzvišeni Allah u Kur'anu na najljepši način govori o svojim vjerovjesnicima, hvali ih i ljudima naređuje da vjeruju u sve njih, bez ikakvog izuzetka: „Recite: 'Mi vjerujemo u Allaha i u ono što se objavljuje nama, i u ono što je objavljeno Ibrahimu, i Ismailu, i Ishaku, i Jakubu, i unucima, i u ono što je dato Musau i Isau, i u ono što je dato vjerovjesnicima od Gospodara njihovog; mi ne pravimo nikakve razlike među njima, i mi se samo Njemu pokoravamo.'“ (El-Bekara, 136)

„Poslanik vjeruje u ono što mu se objavljuje od Gospodara njegovog, i vjernici – svaki vjeruje u Allaha, i u meleke Njegove, i u knjige Njegove, i u poslanike Njegove: 'Mi ne izdvajamo nijednog od poslanika Njegovih.' I oni govore: 'Čujemo i pokoravamo se! Oprosi nam, Gospodaru naš, Tebi ćemo se vratiti!'“ (El-Bekara, 285)

Muhammed, sallallahu alejhi ve sellem, najdosljednije je slijedio ove upute u ovom je pogledu svim muslimanima bio najbolji primjer. On je u duše svojih sljedbenika usadio ljubav prema svim vjerovjesnicima i naučio ih da poštuju i uvažavaju sve vjerovjesnike, da na njih donose salavate, da čuvaju njihovu časti da među njima, u pogledu istinitost i autentičnosti njihovog poslanstva, ne prave nikakve razlike. Također, Muhammed, sallallahu alejhi ve sellem, u mnogim je hadisima svome ummetu navodio vjerovjesnike kao najljepši primjer ustrajnosti u ibadetu i u dobrim djelima, te im je pripovijedao različite događaje iz njihovih života. Jednom prilikom, Muhammed, sallallahu alejhi ve sellem, rekao je: "Primjer mene i vjerovjesnika koju su bili prije mene je kao primjer čovjeka koji je izgradio kuću i u potpunosti je uredio i uljepšao, osim mjesta jedne cigle na uglu te kuće koje je ostalo prazno. Ljudi su obilazili oko nje i, čudeći se i diveći se, govorili: 'Samo još da je ova cigla postavljena!' Ja sam uistinu ta cigla i ja sam pečat svih vjerovjesnika!" (Buhari, 3525, i Muslim, 2286). Također, iako je on najodabraniji od svih vjerovjesnika, iz skromnosti i poniznosti, govorio je: "Nemojte neke vjerovjesnike odlikovati nad drugima!" (Buhari, 3414, i Muslim, 2373). Nastavit će se inšallah...

Izvor: Upoznaj Poslanika u nekoliko minuta



ŠTA ĆEŠ UČINITI AKO POSTANEŠ BOGAT???

Vjerujem da većina ljudi na svijetu mašta o tome da postanu bogati. U tome, inšallah, ne postoji ništa loše ako čovjek ima namjeru, da ako postane bogat, taj imetak troši na način kojim je zadovoljan Uzvišeni Allah.

Ono što sam primijetio i što me potaklo da napišem ovaj tekst, jeste činjenica da sam upoznao i čuo za mnoge koji su nakon postizanja svog 'životnog cilja' i nakon što su postali bogati ili u najmanju ruku nakon što je njihovo poslovanje i investiranje krenulo pozitivnom putanjom, počeli su da okreću leđa svome Gospodaru, tako što su popustili u vjeri.

Mnogi su, prije ostvarenja 'životnog cilja', bili skromni, svojim srcima bili su vezani za Gospodara, mnogo vremena provodili u dovama, a nakon svih tih dunjalučkih ostvarenja zaboravili su na Uzvišenog Allaha.

Koliko je braće koji su prije 'uspjeha' dugo vremena bili redovni u džematu, kontinuirano su dolazili na naučne skupove/dersove. Za njih je nezamislivo bilo da skrate bradu. Neprestano su bili u hizmetu ostalima putem posjeta i brige o potrebnima ali nakon što je biznis počeo da cvijeta i nakon što se počeo osjećati neovisnim desilo se slijedeće: počeo je veoma rijetko dolaziti u džemat, prisustvo predavanjima za njega je prošlost, brada je postala nebitna, nezamislivo je postalo da on nekoga posjeti ili obiđe. Jednostavno, vjera i njeno prakticanje, postali su za njega nešto sporedno.

S druge strane, koliko je sestara koje su prije nego što je njihov muž ispunio 'životni san': nosile jednodijelne široke džilbabe, bez šminke, bez mirisanja, bile posvećene odgoju svoga djeteta, redovne u nekoj od škola za učenje Kur'ana, ali kada je njen muž postigao taj cilj, tada je počela da nosi usku i strukiranu odjeću, turbane, jaknice, hlače, da se šminka prilikom izlaska iz kuće, koristi mirise a da one sestre koje su ostale na onome na čemu je ona bila prije nekoliko godina odjednom počne smatrati nazadnim.

Umjesto da oni, nakon što Allah udovoljio njihovim dovama i nakon što ih je dodatno opskrbio i obasuo imetkom i učinio neovisnim od drugih, budu više zahvalni i više pokorni, nažalost oni se ponašaju slično onima koji su spomenuti u Kur'anu, koji kada ih zadesi nevrijeme na moru, Allaha iskreno mole da ih spasi, a kada ih Allah spasi i dokopaju se kopna, ponovo se vraćaju starom načinu života.

Gospodaru naš, učvrsti nas na putu istine i ne dozvoli da nas zavara prolazni dunjaluk i da bude razlogom popuštanja u vjeri.

Amin.

Facebook profil/ Mr.Elvedin Pezic



Svjedočenje zatvorenika Guantanama

Dok su nas američki vojnici udarali u avionu, čuo se glas ‘Allahu ekber’ i počeli smo klanjati akšam /

Moazzam Beg, bivši zatvorenik američkog zatvora Guantanama opisao je jedan emotivni događaj iz aviona kojim su ih američki vojnici prevozili iz Afganistana na Kubu u zatvor Guantanama.

“Ponekad su ljudi lijeni po pitanju namaza i molitve. Svi to radimo, priznajem i ja sam kriv po tom pitanju. Ali, želim da vam spomenem jedan događaj koji, kad god ga spomenem i sam se naježim. Bili smo zadržani u američkom pritvoru i prevezeni vojnim avionom. Američki vojnici su nas udarali i šutali u avionima. Imali smo vreće na glavama i bili smo zavezanih ruka iza leđa.

Poredani smo u avione sa pojasevima preko nogu koje su isto bile zavezane. U tom trenutku, buka motora i vriska vojnika koji su nam psovali, čuo sam glas sa moje desne strane ‘brate esselamu alejkum’. Odgovorio sam ‘alejkumu selam’. A on me upita ‘brate jesi li klanjao akšam, jer ja mislim da je nastupilo vrijeme namaza’.

Moram vam reći da sam u tom trenutku zaboravio na namaz. Zadnja stvar na mom umu bio je namaz. Razmišljao sam samo da li ću preživjeti ili umrijeti.

Ali tu je bio poslat ovaj melek u ljudskom obliku pored mene da me napomene, da su vremena namaza u određenim vremenima. I na ovaj način, sa rukama vezanim iza leđa, svezanim nogama, vrećom na glavi i oružjem i noževima prislonjenim na našim vratovima, taj brat brat je počeo klanjati izgovarajući ‘Allahu ekber’.

Vidite, ljudi me pitaju da li su nas amerikanci pustili da klanjamo, a ja se smijem. Nisu nas nikad mogli ni zaustaviti”.

Izvor: saff



EKSTREMNA HLADNOĆA - JEDNA OD NAJTEŽIH KAZNI U DŽEHENEMU

Ekstremna hladnoća – jedna od najtežih kazni u Džehennemu

Ekstremna hladnoća je odušak Džehennema

Jedna od najvećih blagodati i pouka zime,-na što mnogi ljudi ne obraćaju pažnju,- je, svakako, i to da nas zimska zemherija (hladnoća) podsjeća na džehennemsku zemheriju (hladnoću) od koje se Allahu trebamo utjecati i dobrim djelima tražiti spas od nje... Prenosi Ebu Hurejre, radijallahu anhu, da je Vjerovjesnik, sallallahu alejhi ve sellem, rekao: „Kada u danu žestoke hladnoće rob kaže: „*La ilahe illellah, što je danas žestoka hladnoća! Allahu moj, sačuvaj me džehennemske zemherije (hladnoće)*“, Uzvišeni

Allah kaže Džehennemu: „Jedan od Mojih robova zatražio je od Mene da ga zaštitim od tvoga zemherira (hladnoće) i Ja te uzimam za svjedoka da sam ga zaštitio.“ Upitali su: „A šta je to džehennemska zemherija?“ Rekao je: „ To je prebivalište u koje će biti bačen nevjernik i u kojem će se raspadati od žestoke hladnoće.“

(Hadis Bilježi Ibn Es-Sunni u djelu „Amelu-l-jevmi ve-l-lejle, 100/301 i El-Bejheki u djelu El-Esmaj ve-s-sifati, 177-178.) Iako vjerodostojnost ovoga hadisa nije potvrđena, hladnoća koja nas je zadesila, ipak nas treba podsjećati na džehennemski zemherir (hladnoću), od koje svakako trebamo tražiti zaštitu od Allaha.

Prenosi također Ebu Hurejre, radijallahu anhu, da je Vjerovjesnik, sallallahu alejhi ve sellem, rekao: „Džehennemska vatra se požalila svome Gospodaru i rekla: „Sama sebe pojedoh (uništih).“ Allah joj je dopustio dva oduška, jedan zimi, a jedan ljeti i to je najveća vrućina i najveća hladnoća koju osjećate.“ (Buhari, 3020, Muslim, 977)

Prenosi se od Ibn Abbasa, radijallahu anhu, da je rekao: „Stanovnici Džehenema će zatražiti spas od vatre, pa će im biti poslan hladni vjetar od čije hladnoće će se kosti raspadati, a oni će zatražiti da im se ponovo vrati džehennemska vrelinu.“ (Ibn Ebi Dunja u djelu Sifetu-n-nar, 152.)

Prenosi se od Abdul-Melika ibn Umejra da je rekao: „Čuo sam da će stanovnici Džehenema zamoliti njegovu čuvara da ih izvede u kraj Džehenema. Bit će izvedeni, ali će zateći nenasnosnu i ubitačnu hladnoću-zemherir, tako da će se ponovo vratiti u vatru, zbog hladnoće koju su tamo našli.“ Kao što vidimo, kako god će stanovnici Džehenema biti kažnjavani nenasnosnom vrućinom, tako će biti kažnjavani i nepodnošljivom hladnoćom, koja se naziva zemherir. Uzvišeni Allah kaže: „**Pa neka okušaju vodu ključalu i hladnoću nenasnosnu (gassak).**“ (Sad, 57.) Ibn Abbas je rekao: „Gassak je hladna zemherija koja će svojom hladnoćom pržiti.“ Neki su kazali da je gassak hladna smrdljiva kapljevinu.

Jedan pobožnjak je rekao: „Nikada nisam gledao snijeg kako pada, a da se nisam sjetio lepršanja listova (suhufa) na dan proživljenja i okupljanja.“

Pravi vjernik iz svakog prizora i događaja treba da izvuče pouku, a naročito iz onih neuobičajenih i rijetko vidljivih, kao što su ekstremne vrućine i hladnoće. Prenosi se da je Zubejd El-Jami jedne noći ustao da klanja noćni namaz. Došao je do posude u kojoj je bila voda za abdest i kada je stavio ruku u nju, osjetio je da je voda izuzetno hladna, skoro da se zaledio od njene hladnoće. Tada se sjetio zemherira (džehennemske hladnoće) i ruka mu je ostala u posudi, koju nije izvadio sve dok nije svanulo. Ujutro je došla njegova služavka i kada ga je zatekla u takvom stanju, upitala je: „Šta je tebi, gospodaru? Zašto nisi klanjao ove noći kao što obično klanjaš, nego tako sjediš u tom stanju?“ On je odgovorio: „Teško tebi! Stavio sam ruku u ovu posudu u kojoj je bila izuzetno hladna voda. Sjetio sam se zemherira i tako mi Allaha, nisam osjetio žestinu hladnoće sve dok mi ti nisi došla.“ Zaboravi i nikome o ovome ne pričaj dok sam živ.“ Niko za to nije ni saznao, sve dok, Allah mu se smilovao, nije umro.“



Hladnoća je teža od vrućine


Iako je vrućina teško podnošljiva, -ona uglavnom nije ubitačna, -ipak je hladnoća gora i teža za podnošenje. Zbog toga se ljudi više pribojavaju hladnoće, nego vrućine, na što upućuje i sam Kur'an. Uzvišeni Allah na početku sure En-nahl spominje glavne i osnovne blagodati koje je dao čovjeku od kojih je i stoka. Uzvišeni kaže: „**i stoku On za vas stvara, njome se od hladnoće štite, a i drugih koristi imate, a njome se i hranite.**“ (En-Nahl, 5.) A na kraju sure spominje ono što nadopunjava spomenute blagodati, pa kaže: „...**i odjeću koja vas čuva od vrućine i daje vam i oklope koji vas u borbi štite, i tako vam upotpunjava blagodat svoju, da bi ste bili poslušni.**“ (En-Nahl, 81.)

Uzvišeni Allah u ovome ajetu, odjeću kojom se štitimo od hladnoće, nije spomenuo kao ono čime se upotpunjava Njegova blagodat, zbog toga što ju je spomenuo sa osnovnim i glavnim blagodatima na početku sure. Zaista je odjeća, a posebno ona od krzna i vune, velika blagodat bez koje bi teško podnijeli zimu i velike hladnoće. To najbolje osjetimo i dokučimo kada slabo obučeni izađemo napolje u ovim danima ekstremnih hladnoća.

Savršenstvo blagodati koje će uživati stanovnici Dženneta, ogleda se i u tome da u njemu neće osjetiti ni vrućine ni hladnoće. Uzvišeni Allaha kaže: „...**naslonjeni na divanima, oni u njemu ni žegu ni hladnoću neće osjetiti.**“ (El-Insan, 13.) Katade je rekao: „Allah je znao da žega i žestoka hladnoća uznemiravaju ljude i pričinjavaju im neugodnosti, pa ih je (džennetlije) u Džennetu sačuvao i jednog i drugog ezijeta.“

Sjetimo se gladnih i nemoćnih

Dok sjedimo u svojim toplim domovima, siti i bezbjedni, sjetimo se onih beskućnika, siromašnih i gladnih, koji u svakom mjestu ima i koji u ovim hladnim zimskim danima, nemaju tople domove, nemaju šta naložiti i nemaju čime nahraniti svoju čeljad. Pomozimo ih u ovim danima nepodnošljive hladnoće i zime. Odnosimo im hrane, odjeće i ogrijeva. Tako ćemo se najbolje Allahu zahvaliti na blagodatima koje nam je podario.



Isto tako, nemojmo zaboraviti našu braću muslimane u islamskom svijetu, koji ne uživaju blagodati koje mi uživamo, a naročito muslimane u Palestini i Siriji, koji trpe torture nasilnika i koje ove zimske dane provode u strahu, nesigurnosti, mnogi od njih bez svoga doma, u kolektivnim centrima i šatorskim naseljima. Sjetimo ih se pa makar dovom, jer oni su naša braća muslimani, oni su ljudi. To je naša najmanja obaveza i pokazatelj našeg imana. Poslanik, sallallahu alejhi ve sellem, je rekao: „*Vjernike u njihovoj međusobnoj samilosti, ljubavi i suosjećanju, vidiš kao jedno tijelo. Kada jedan organ oboli, cijelo tijelo zbog toga osjeća nesanicu i groznicu.*“

Izvor: NUM.com/Abdulvaris Ribo, prof.



Radost Bošnjaka u Švedskoj: Sa munare će se pet puta dnevno čuti ezan

Islamski kulturni centar u gradu Karlskruna, u južnoj švedskoj regiji Blekinge, koji okuplja muslimane ove regije, većinom Bošnjake, dobio je dozvolu da se sa njegove munare pet puta dnevno uči ezan putem razglasa, što je prvi put zabilježeno u ovoj zemlji. Islamski kulturni centar u gradu Karlskruna, u južnoj švedskoj regiji Blekinge, koji okuplja muslimane ove regije, većinom Bošnjake, dobio je dozvolu da se sa njegove munare pet puta dnevno uči ezan putem razglasa, što je prvi put zabilježeno u ovoj zemlji, javlja Anadolu Agency (AA).

Čast da prvi prouči ezan, poziv za molitvu muslimanima, pripala je predsjedniku Islamskog kulturnog centra Abdurrahmanu Tamarji. Tom prilikom u centru su se okupili i brojni vjernici kako bi svjedočili ovom trenutku, tokom kojeg pojedini nisu mogli prikriti suze. Tamarji je u razgovoru za AA potvrdio je kako je prvi put na području Švedske izdata dozvola za učenje ezana putem razgasa za svih pet dnevnih namaza.

“Mi ćemo za sada ovu dozvolu koristiti samo petkom, dakle za ezan prije džume-namaza. Obzirom da se džamija nalazi u naseljenoj četvri, ne znamo kakve ćemo dobiti reakcije. Meni je pripala čast da prvi proučim ezan, bio sam uzbuđen”, kazao je Tamarji. Dodao je kako je njihov centar prvi sa munarom u regiji Belkinge, te kako je process dobivanja dozvole za gradnju munare trajao pet godina.

Munaruru za islamski centar sagradio je vrsni graditelj iz Bugojna Ramiz Ahmetović, koji je iza sebe ima 170 sagrađenih munara.

Akos.ba



Muslimanske ekspedicije na američkom tlu prije Kolumba

Brojni dokazi upućuju na zaključak da su muslimani Španije i Sjeverne Afrike na tlo američkog kontinenta stigli barem pet vijekova prije Kolumba.

Historičar i geograf Ebu Hasan Ali b. Husejn el-Mesudi (871.–957.) u svom djelu *Murudžuz-zeheb ve meadinul-dževher* navodi da je u vrijeme vladavine Abdullaha b. Muhammeda (888.–912.) u Endelusu, muslimanski moreplovac i istraživač Hašhaš b. Seid godine 889. iz luke Delba (Palos, Španija) zaplovio preko Atlantskog okeana i da je pronašao nepoznato kopno (na arapskom jeziku *ard medžhula*), te da se vratio s ogromnim količinama blaga. Mesudi je načinio kartu na kojoj je ucrtao veliki dio te “nepoznate zemlje” iz čega je očito da se radi o američkoj obali Atlantskog okeana. (Al-Masudi, *Muruj Adh-Dhahab / Arabic/*, Vol. 1, P. 138)

Historičar Ebu Bekr b. Omer el-Gutijja zabilježio je da je tokom vladavine Hišama Drugog (979.–1006.) u Endelusu, drugi muslimanski moreplovac i istraživač Ibn Ferruh, 999. godine, u februaru, isplovio iz luke Kadeš preko Atlantskog okeana i da je doplovio do ostrva Gando (Kanarska ostrva), gdje je posjetio kralja Guanariga, a zatim je nastavio plovidbu u pravcu zapada te je pronašao dva ostrva koja je imenovao Caparia i Pluitana. Vratio se u Španiju u maju 999. (ref. On Manuel Osunay Savinon *Resumen de la Geografia Fisica...*, Santa Cruz de Tenerife, 1844)

Geograf i kartograf Šerif el-Idrisi (1099.–1166.) u svojoj čuvenoj knjizi *Nuzhat el-mushtak fi ihtirak al-afak* navodi

da je ekspedicija sjevernoafričkih moreplovaca iz luke Lisabon zaplovila u “mračno more” (Atlantski okean) kako bi ga istražili i otkrili gdje završava i šta dolazi iza njega: tokom svoje ekspedicije, piše Idrisi, ovi muslimanski moreplovci došli su na ostrvo čiji je predstavnik s njima razgovarao na arapskom jeziku. (ref. Al-Idrissi, *Nuzhat Al-Mushtaq fi Ikhtiraq Al-Afaaq /Arabic/*)

Muslimanski izvori spominju i dobro dokumentiranu ekspediciju šejha Zejnuddina Alija b. Fadila el-Mazenderanija, koji je isplovio iz luke Tarfaja (južni Maroko), u vrijeme vladavine Ebu Jakuba Sidi Jusufa Šestog, kralja dinastije Marinida. Sa svojom ekspedicijom Mazenderani se 1291. iskrcao na Green Island, na Karibima. Detalji njegovog putovanja navode se u brojnim izvorima muslimanskih historičara.

U svojoj čuvenoj knjizi *El-Ebsaar fi mamālik el-emsār* historičar Šihabuddin Ebu Abbas b. Adl el-Umeri (1300.–1384.) detaljno opisuje geografsko istraživanje Atlantskog okeana ekspedicije predvođene vladarom Kraljevine Mali, sultanom Ebu Bakarijem Prvim. (ref. Giles Cauvet, *Les Berbers de L’Amerique*, Paris 1912, P. 100–101)

Brat i nasljednik sultana Ebu Bakarija, sultan Mansu Kankan Musa (1312.–1337.), čuveni vladar Mandinka naroda, tokom svog putovanja na hadž 1324. ispričao je učenjacima u Kairu da je postao kralj 1311., nakon što se njegov brat Ebu Bakari vratio iz druge ekspedicije u Atlantskom okeanu. (ref. Patrick Huyghe, *Columbus was Last*, New York, 1992)

Renomirani američki historičar i lingvist Leo Weiner, nekadašnji profesor na Harvardu, u svojoj knjizi *Africa and discovery of America* (1920.) tvrdi kako je Kolumbo znao da su pripadnici Mandinka naroda (muslimanski narod iz zapadne Afrike) u novi svijet doplovili prije njega, da su obišli Karibe, centralne, južne i sjeverne američke teritorije, uključujući i Kanadu, i da su imali razvijene trgovačke odnose sa Indijancima iz plemena Irokezi i Algonkin (Algonquin). (ref. Weiner, Leo *Africa and the Discovery of America*, Philadelphia, 1920, Vol. 2 P. 365–6)

Izvor: *El-Asr*

Bosanski tragač za kostima Ramiz Nukić: Nijedna kazna nije dovoljna za Ratka Mladića

Ramiz Nukić, jedan od preživjelih iz strahoda genocida u Srebrenici i čovjek koji danas traga za kostima žrtava strašne agresije na BiH, uoči presude Ratku Mladiću, generalu vojske bosanskih Srba kaže da za Mladića ne postoji adekvatna kazna.



U julu 1995. godine, nakon što je enklava Srebrenica koja je bila pod zaštitom UN-a zauzeta, vojska bosanskih Srba na čelu s Ratkom Mladićem napala je nenaoružane muškarce, žene i djecu. Nakon toga dogodio se jedan od najvećih zločina nakon Drugog svjetskog rata, u kojem je ubijeno više od 8.000 muškaraca i dječaka bošnjačke nacionalnosti, podsjeća [Deutsche Welle](#).

Ramiz je, pukom srećom, uspio preživjeti golgote Srebrenice i jedan je od mnogih koji iščekuju pravdu i presudu u slučaju Ratka Mladića, ali ističe kako nije mnogo uzbuđen zbog presude.

"Ratni zločinci će biti kažnjeni, ali će jednog dana izaći iz zatvora, na ovaj ili onaj način. A žrtve niko ne može vratiti. Svi bi se trebali suočiti s licem pravde, sudovi imaju svoju moć, ali niko ne može zadovoljiti moju želju da se vrati moja porodica. Bez obzira kako kazne Mladića, to nikada neće biti dovoljno za mene", kaže Ramiz koji je u Srebrenici izgubio oca i dvojicu braće.

On ističe kako je bolju pravdu pronašao u traganju za kostima žrtava, nedužnih ljudi koji nikada ne smiju biti zaboravljeni.

"Moramo podsjećati svoju djecu i unuke na ono što se desilo ovdje. I ti događaji i žrtve su nešto što nikada ne smijemo zaboraviti, upravo kako se to ne bi ponovilo nikada više", kazao je Ramiz za [Deutsche Welle](#).

On se sedam godina nakon genocida u Srebrenici vratio svojoj kući, u selo Kamenicino brdo nadomak Srebrenice. Tada je bio nezaposlen, ali je uskoro otvorio svoju farmu, no ni to mu nije došlo smiraj, te je odlučio da potraži njihove kosti. Kada je krenuo u potragu bio je prestravljen količinom kostiju i skeleta koje je pronašao u blizini Srebrenice.



© DW/Z. Ljubas

"Meni su sve kosti iste i bilo je teško prepoznati da li se negdje tu nalaze moj otac i braća. Ipak, zbog velike količine odlučio sam da prikupim sve te kosti i odnesem ih u Institut za nestale", pojasnio je Ramiz, koji tada nije uspio pronaći članove porodice. Ipak, otkriveni su kasnije u jednoj od masovnih grobnica u blizini Zvornika, prenosi [Deutsche Welle](#).

No, iako je pronašao članove svoje porodice i doveo ih do vječnog smiraja, Ramiz nije mogao pronaći mir zbog drugih porodica te i danas traga za kostima svojih sugrađana koji su ubijeni u julsom paklu 1995. godine.

(Bportal.ba/DW)

Demografska borba Palestinaca protiv Izraela

Porodice s velikim brojem djece tradicija su u Gazi. Žene rađaju prosječno četvero djece, zbog čega Gaza ima jednu od najviših stopa nataliteta u svijetu.

Kulturna i socijalna tradicija jedan su od razloga, ali mnogi roditelji smatraju i da mogu doprinijeti rastu palestinske populacije.

Ulice Gaze prepune su djece. U jednoj od najgušće naseljenih regija svijeta polovina stanovništva mlađa je od 18 godina.

Ekipa Al Jazeera posjetila je porodicu u kojoj odrasta 19 djece. Njihov djed Husein al-Amoudy imao je sedmericu sinova. Smatra da su djeca presudni faktor u borbi protiv Izraela.

'Revolucionarni narod'

"Mi smo revolucionarni narod koji se mnogo žrtvuje. Neka od naše djece bivaju ubijena, druga završavaju u izraelskim zatvorima. Zato moramo nadoknaditi te gubitke rađanjem više djece. To nam je u krvi, tako ćemo osloboditi Palestinu", kaže Al-Amoudy.

Dvojica njegovih sinova poginula su kao pripadnici oružanih grupa u Pojasu Gaze. Sinovi će im, kaže Husein, kad odrastu, zauzeti njihovo mjesto u borbi.

"Ne zamišljaju svi roditelji ovdje kako će njihova djeca postati borci u redovima oružanih grupa. Većina jednostavno vidi velike porodice kao metodu za povećanje palestinske populacije i pobjedu u demografskom ratu protiv Izraela", izvještava reporterka Al Jazeera Jane Ferguson.

Stručnjak za plodnost

Pacijentice dolaze kod ljekarra Ghalayinija kako bi dobile savjete o rađanju što većeg broja djece. "Parovi smatraju da su dio političkog konflikta koji se vodi u ovom području. Naša zemlja je okupirana i ljudi vjeruju da je demografski faktor jedno od oružja kojim će je okončati", ističe Bahar al-Ghalayini, stručnjak za plodnost.

Djeca su često žrtve u ratu protiv Izraela. Samo u posljednjem sukobu poginulo ih je više od 500. Primirje se sada poštuje i djeca se bezbrižno igraju na ulicama, odrastajući u novu generaciju koja će se boriti za okončanje okupacije.

(Agencije)

Poslanik Ibrahim, a.s.

Nekada davno, u malom selu po imenu Ur, rodio se dječak. Volio je Dragog Allah više od svega na svijetu. Kad je odrastao, Allah, dž.š., učinio ga je Poslanikom. Nažalost, drugi stanovnici tog sela nisu bili privrženi Allahu, dž.š., i nisu Mu se molili niti sedžu činili. Umjesto da čini dovu jednom Gospodaru, molili su se kamenjima i kipovima. Čak su sagradili posebnu građevinu za njih. Ibrahim, a.s, mrzio je kamenje i kipove i rekao je narodu: "Morate se moliti Allahu dž.š.,!" Niko nije obraćao pažnju na njega. Jednoga dana, kad su svi otišli na pijacu, Ibrahim, a.s., ostao je sam i pomislio: "Selo je prazno, sam sam. Sada je prilika da se riješim kipova. Onda će

se svi početi klanjati i moliti Allahu dž.š.,." Poslanik Ibrahim a.s., otišao je u prostoriju kojoj su čuvani kipovi. Uzeo je malj i slupao jedan po jedan. Kad su se ljudi vratili u selo, našli su samo hrpu krhotina. Bili su ljuti i vikali su na Ibrahima, a.s. Zarobili su ga, svezali mu ruke i noge i bacili u vatru. Pošto je Allah, dž.š., volio svog Poslanika, nije dopusti da mu griješnici naude i naredio je vatri: "Budi hladna!" Vatra se pokorila i postala hladna, ne preći Ibrahima, a.s. Bio je spašan! Nakon ovog događaja, poslanik Ibrahim, a.s., postao je nevjerovatno snažan, jer je znao da je uz njega Allah, dž.š. Upozorio svoj narod da zaboravi kamene kipove i da se pokore Allahu, dž.š. Hodao je od sela do sela i pripovijedao ljudima o Dragom Allahu. U početku mu je samo par ljudi povjerovalo. Vremenom mu se pridružili puno ljudi. Allah, dž.š., pazi one koji Ga vole i uvijek je uz njih. Poruka ove priče je da jedino vjera u Allahu dž.š., može spasiti vjernika na ovom i budućem svijetu.

Izvor: Najljepše priče iz Kur'ana

Priredila: Lenny Alina Mujakić



Ah, taj sabah namaz!

Svako jutro, nakon što obaviš sabah namaz, meleki, kojima je tada smjena, obavijeste lično Uzvišenog Allaha (iako On, s.w.t., zna), da su te zatekli i ostavili kako klanjaš.

Ebu Hurejre prenosi ove riječi od Allahova poslanika, saws,: "Nad vama neizmjenično bdiju meleki dana i meleki noći, a sastaju se (smjenjuju se) na sabahskom i ikindijskom namazu. Zatim se oni koji su medju vama noćili penju (na nebesa), pa ih Allah, dž.š., upita – a On najbolje zna:- U kakvom stanju ste ostavili moje robove? – a meleki odgovore:- Ostavili smo ih da klanjaju, a zatekli smo ih da klanjaju." (Hadis biljeze Buharija i Muslim)

Zar ti nije dovoljno, da svaki dan budeš kod Allaha spomenut od strane meleka?

Saudin Cokoja

Firdeus info

VEČER KUR'ANA



u sjećanju.

U organizaciji džemata Firdeus Offenbach je održana Večer Kur'ana u gradskoj sali grada Mühlheim am Main. Naši gosti su ove noći bili mr. Elvedin Pezic, hafiz Fuad Seferagic, Haris ef. Kalac I domacin sekretar našeg Džemata Medin Džigal. Nastup su ovu noć uljepšali naši "mališani" mektebskog hora "Firdeus". U prepunoj sali se tražila stolica više, dočekano preko 600 Bošnjaka. Također se želimo zahvaliti svim našim članovima koji su neumorno do duboko u noci radili na organizaciji i dočekivanju gostiju, ponosni smo na vas Ovo je noć koja ce bošnjacima Offenbacha i okoline još dugo ostati



Halka Kur'ana

Svake subote između akšam i jacije namaza se održava halka Kur'ana za muškarce, kao i druženje uz kahvu i kolač gdje se diskutuje o raznim islamskim temama. Ljubav prema Stvoritelju, džamiji i bratska sloga su motivatori ovih redovnih druženja.

Bujrmu, dođite da se družimo



Bunar u Gambiji

Da se vrijedne džematlije džemata Firdeus Offenbach nisu usmjerile na pomaganje samo svojih Bošnjaka Bosne i Sandžaka nego i onih od Ummeta kojima je pomoć potrebna je očigledno. U prilogu su fotografije izgrađenog jednog od dva bunara u Gambiji koji će značajno olakšati stanovnicima tog područja u njihovoj svakodnevici.

Želimo da se zahvalimo svima onima koji su na bilo koji način sudjelovali u ovom hairli projektu. Molimo Allaha da primi naša djela i upiše u trajnu sadaku. Amin!

Priredio: Kemal Džomba

Indijski oraščići



Indijski oraščić nije samo fina, nego hranjiva i zdrava namirnica, koju vrijedi redovito konzumirati zbog dobrobiti, koje donosi za zdravlje.

Zbog svog nježnog okusa, indijski oraščić je mnogima omiljeni snack, koji se može kupiti skoro u svakom supermarketu tokom cijele godine. Indijski oraščić se koristi ne samo kao zakuska, nego i u salatama, slatkišima, namazima i jelima od povrća. Od njega se pravi i maslac, koji ima delikatesan okus.

Indijski oraščić zapravo i nije orašasti plod, nego sjemenka cashew jabuke – ploda

indijskog oraha.

Indijski orah (*Anacardium occidentale*) je malo zimzeleno drvo visine do najviše 12 m, podrijetlom iz Brazila. Indijski orah se sada uzgaja u mnogim tropskim područjima svijeta zbog svog ploda i sjemena. Plod Indijskog oraha se zove jabuka cashew i popularan je u Brazilu i na Karipskim otocima, gdje se smatra delikatesom.

Za razliku od jabuke cashew, sjeme ovog ploda – indijski oraščić - je poznato diljem cijelog svijeta zbog svog okusa i nutritivnih svojstava.

Za zdravlje kardiovaskularnog sistema

Indijski oraščić sadrži puno manje masnoće, nego ostali orašasti plodovi (zbog čega je posebno pogodan kao dio dijete za mršavljenje).

Dvije trećine masnoća u Indijskom oraščiću su nezasićene masne kiseline. 75% tih nezasićenih masnih kiselina čini oleinska kiselina (nju sadrži i maslinovo ulje) poznata po svom blagotvornom utjecaju na zdravlje srca.

Blagotvoran uticaj na dijabetes

Nezasićene masne kiseline, koje sadrži indijski oraščić, blagotvorno utječu i na dijabetes, pomažući sniziti nivo triglicerida i štiteći od daljnjih komplikacija povezanih sa visokom razinom šećera i kolesterola. Redovno konzumiranje Indijskih oraščića značajno smanjuje rizik od pojave dijabetesa tipa 2.

Antioksidanti

Indijski oraščić je odličan izvor antioksidanata. Antioksidanti su skupina različitih prirodnih spojeva koji u organizmu čovjeka igraju važnu ulogu zaštite od štetnog djelovanja slobodnih radikala. Slobodni radikali su molekule koje imaju nespareni elektron i stoga su izuzetno reaktivni. Slobodni radikali danas se povezuju s nastankom bolesti krvožilnog sustava, sivom mrenom, rakom, bolestima zglobova i brojnim drugim poremećajima zdravlja.

Bakar

Indijski oraščić je bogat bakrom, koji igra važnu ulogu u zdravlju našeg organizma. Bakar sudjeluje u cijelom nizu fizioloških procesa organizma, uključujući apsorpciju željeza, borbu sa slobodnim radikalima, razvoj kosti i vezivnih tkiva, proizvodnju melanina – pigmenta, koji koži i kosi daje njihovu prirodnu boju.

Magnezij

Indijski oraščić sadrži visoke količine magnezija, koji je neophodan za rad našeg organizma. Magnezij je iznimno važan za metabolizam, igra ulogu u formiranju kostiju, proteina, masnih kiselina, grušanju krvi, opuštanju mišića itd. Redovni unos magnezija može zaštititi od visokog tlaka, grčeva u mišićima, glavobolje, kroničnog umora.

Mršavljenje

Često se preporučuje uzimati indijski oraščić kao dio zdrave dijete za mršavljenje. Indijski oraščići ne sadrže kolesterol, bogati su dijetalnim vlaknima i daju puno energije. Umjereno konzumiranje ove namirnice tokom dijete daje osjećaj sitosti i zadovoljstva.


Prevenција žučnih kamenaca

Redovito konzumiranje indijskih oraščića značajno smanjuje rizik od pojave žučnih kamenaca. Ova činjenica je potvrđena istraživanjem, u kojem je sudjelovalo više od 80 tisuća žena, koje su redovito konzumirali orašasto voće.

Zdravlje zubi i usne šupljine

Indijski oraščić čuva zdravlje zub i desni na takav način da uništava bakterije, koje uzrokuju karijes, bolesti desni, akne, tuberkulozu i druge bolesti.

Izvor: zdravahrana.com



Nesib Malkić

NARODNI HEROJ OSLOBODILAČKOG RATA


Nesib Malkić rođen je u Gornjim Dubravama (Živinice) 05. jula 1961. godine.

Bio je aktivno vojno lice. Život u odbrani države je položio na dužnosti komandanta 210. brdske brigade prilikom izviđanja u rejonu Crne Rijeke kod Olova 25. oktobra 1993. godine. Brigada kojom je komandovao, nakon njegove pogibije dobila je naziv "210. viteška brigada Nesib Malkić".

Bio je nosilac ratnog priznanja Zlatni ljiljan od 1993. godine.
Posthumno je odlikovan Ordenom heroja oslobodilačkog rata 1994. godine.

Islamska Zajednica Bošnjaka Offenbach

Džemat Firdeus Offenbach



Obavještavamo sve zainteresovane, izlašla je nova knjiga mr. Elvedina Pezića pod nazivom „ISLAM U VREMENU“

Knjiga je dostupna lično u džematskim prostorijama ili putem pošte diljem EU!

Posebna ponuda za džemate!

Svi zainteresovani neka nas kontaktiraju putem fb profila

„Džemat Firdeus Offenbach“

ili na telefon +49 15755670726

CIJENA

17 €

Generalni distributer
za Njemačku + EU



Islamska Zajednica Bošnjaka Offenbach
Džemat Firdeus Offenbach

Wald Strasse 167 | 63071 Offenbach am Main



Džemat Firdeus Offenbach